

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATO' OTHMAN BIN AZIZ
(JERLUN)**

PERTANYAAN : LISAN

TARIKH : 01.04.2015

Y.B. DATO' OTHMAN BIN AZIZ [JERLUN] minta **MENTERI KEWANGAN** menyatakan kesan kejatuhan harga minyak dan mata wang Malaysia terhadap ekonomi negara dan nyatakan pelan strategik Kementerian untuk mengekang tekanan ekonomi dalam jangka masa pendek dan panjang.

JAWAPAN

Sebagai sebuah negara ekonomi terbuka, Malaysia terdedah kepada persekitaran luar yang tidak menentu termasuk, melalui kejatuhan harga

minyak mentah dunia serta pertumbuhan sederhana ekonomi global dan serantau. Perkembangan ini boleh memberi kesan kepada ekonomi Malaysia. Namun demikian, kejatuhan harga minyak tidak memberi impak yang begitu ketara secara keseluruhannya, memandangkan struktur ekonomi negara kita kini lebih pelbagai dan meluas disokong oleh peningkatan daya tahan dan daya saing serta asas-asas ekonomi yang kukuh.

2. Penyusutan kadar pertukaran nilai ringgit yang berlaku baru-baru ini juga bukanlah suatu kes terpencil dan penyusutan tersebut didorong terutamanya oleh faktor luaran. Ini termasuk pengukuhan dolar Amerika Syarikat berikutan prospek negara Amerika yang semakin kukuh dan kemungkinan kenaikan kadar faedah di negara berkenaan.

3. Jika melihat perubahan senario ekonomi global yang faktor-faktornya di luar kawalan kita berikutan kejatuhan harga minyak yang ketara serta penyusutan nilai mata wang ringgit dalam tempoh suku keempat 2014, prestasi ekonomi negara sebenarnya terus berkembang. Keluaran Dalam Negeri Kasar (KDNK) mencatat pertumbuhan yang sebanyak 5.8 peratus

pada suku keempat 2014 berbanding 5.6% dalam suku ketiga sebelumnya, dipacu oleh kecergasan aktiviti permintaan domestik. Berdasarkan prestasi ekonomi yang memberangsangkan ini, KDNK negara terus berkembang sebanyak 6 peratus bagi keseluruhan tahun 2014 berbanding 4.7 peratus pada tahun 2013.

4 Bagi menyokong tekanan ekonomi dalam jangka masa pendek dan panjang, Kerajaan komited terhadap konsolidasi fiskal dengan mengurangkan defisit secara berperingkat ke arah mencapai bajet berimbang pada tahun 2020. Kerajaan akan terus melaksanakan program pembaharuan fiskal (*fiscal reform*) bagi mengukuhkan kedudukan kewangan dan memastikan kemampanan fiskal jangka panjang negara. Kemampanan fiskal adalah penting bagi mengekalkan daya tahan ekonomi negara, mewujudkan ruang fiskal (*fiscal space*) untuk melaksanakan program dan projek pembangunan seterusnya memastikan kesejahteraan rakyat.

5. Melalui langkah-langkah proaktif seperti yang diumumkan dalam perutusan khas oleh Yang Amat Berhormat Perdana Menteri pada 20

Januari yang lalu, KDNK negara diunjur berkembang antara 4.5 peratus hingga 5.5 peratus pada tahun 2015. Langkah-langkah proaktif tersebut bertujuan memastikan ekonomi negara terus berkembang dan seimbang dengan tumpuan diberikan kepada perbelanjaan pengguna, pelaburan dan eksport.

6. Kerajaan turut menyemak semula sasaran paras defisit fiskal 2015 sebagai peratusan KDNK daripada 3% kepada 3.2%. Bagi mencapai sasaran defisit baru ini, Kerajaan telah dan akan melaksanakan *fiscal adjustment* melalui langkah-langkah peningkatan hasil dan rasionalisasi perbelanjaan yang dijangka membawa kepada tambahan hasil sebanyak RM1.4 bilion dan penjimatan perbelanjaan sebanyak RM5.5 bilion.

7. Bagi menangani penurunan peratusan hasil berkaitan petroleum kepada jumlah keseluruhan hasil Kerajaan daripada 41% pada tahun 2009 kepada 30% pada tahun 2014 dan dijangka terus menurun kepada 27% pada tahun 2015, Kerajaan akan memastikan kebergantungan kepada hasil berkaitan petroleum dapat dikurangkan dengan meningkatkan dan mempelbagaikan sumber hasil, termasuk melalui pelaksanaan GST mulai

April 2015, menambahbaik sistem pentadbiran cukai dan meningkatkan pematuhan cukai dan pengauditan. Kerajaan juga akan memperteguh asas-asas ekonomi makro negara untuk meningkatkan lagi aktiviti ekonomi dan keuntungan sektor swasta, seterusnya dapat menyumbang kepada peningkatan hasil.

8. Kerajaan juga sentiasa berusaha mengoptimumkan perbelanjaan mengurus serta memastikan kecekapan perbelanjaan Kerajaan bagi mengelakkan pertambahan peruntukan dan ketirisan melalui pelaksanaan sistem *Outcome Based Budgeting* (OBB). Penilaian secara berterusan ke atas keperluan perbelanjaan dengan mengambil kira komitmen baharu serta keupayaan jabatan Kerajaan untuk menjayakan projek yang dirancang sentiasa diutamakan.